

INUIT ATAQATIGIIT

INATSISARTUNI



UPA 2015/57
Ane Hansen
25 marts 2015

Meeqqanut suli atualersimangitsunut naleqquttumik Kullorsuarmi perorsaanikkut ineriartornissamut neqerooruteqalersinnaanermut tunngatillugu sanaartornikkut pisariaqartitsinerup misissuiffigneqarnissaanik Naalakkersuisut peqquneqarnissaat pillugu Inatsisartut aalajangiiffigisassaattut siunnersuut. Misissuinermut ilaliullugu kommunimut pineqartumut inassuteqaatinik suliaqartoqartariaqarpoq, nammineq killiliussat iluanni pisariaqartitsinerup tamatuma naammassiniarneqarsinnaanera pillugu.

(Inatsisartunut ilaasortaq Hans Enoksen, Partii Naleraq)

Inatsisartuni ilaasortaq Hans Enoksen Kullorsuarmi meeqqeriveqanginnera pillugu Namminersorlutik oqartussat kommunillu akornanni suleqatigiittoqartariaqarneranik qaqitsimmat qutsavigaarput. Meeqqerivinnik amigaateqarneq nunaqarfinni amerlavallaartuni piuvoq akueriinnarneqarsinnaanngilarlu siparniarnermi tulleriarinermi sanaartugassanillu tulleriarinermi meeqqeriviliornissamik siunertat amerlavallaatigut tunulliuqqartarmata.

Meeqqeriveqarneq meeqqat sumiginnarneqaratik ataavartumik isumassorneqarnissaannut pingaaruteqartorujussuuvoq. Ullumikkut meeqqat atuarfiani angusarissaannginnerup takutippaa suli nunatsinni meeqqat amerlavallaartut sumiginnarneqartartut aamma nunaqarfinni.

Taamaattumik nunarfiit inuttunerpaat ilaanni meeraqarnerpaamilu soorlu Kullorsuarmi suli meeqqeriviliortoqarsimanginnera tamatsinnut aalassaataasariaqarpoq iliuseqarfigineqartariaqartoq. Naammangilaq oqaannassalluni Naalakkersuisut meeqqat atuarfiisa illutaasalu piorersut pitsaassusaannik misissorneqartussaammata siunnersuut itigartinneqartoq.

Inuit Ataqatigiit inassutigerusupparput nunaqarfinni illoqarfinnilu meeqqeriveqarnermi amigaataasut KANUKOKA kommunillu peqatigalugit pimoorussamik nalilersuisoqarniarli pisariaqartitsinerpaanilu sanaartornissaq siunertaralugu tulleriarinissamik tigussaasumik suliaqartoqarli kommunit aningaasarliorneq pissutigalugu siparniarnermi siulliullugit meeqqeriviliortitsineq eqqartorneqartussaajunnaarlugit.

Siunnersuut una itigartiinnavinnagu tulleriarinissami sulianut ilanngunneqarnissaa inassutigaarput.